

Date – 22/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Planning, Statistics and Programme Implementation changtu Minister of State Pu Rao Inderjit Singh an vawiin hian Hnahthial a tlawh ang.
- 2. Chief Minister Pu Lalduhoman Mizo hmeichhiate chu state thawhchhuahah an inrawlhthuk hle, a ti.
- 3. Jammu & Kashmir-a Pahalgam-ah firfiakten khualzin 26 an kaphlum a, midang engemawzatin hliam an tuar
- 4. Khawvel ram hruaituten Pahalgam-a firfiakte chetna chu an dem thu an sawi.

<><><>

UNION MINISTER

Ni hnih cham tur sorkar laipuia Planning, Statistics and Programme Implementation changtu Minister of State Pu Rao Inderjit Singh chuan nimin khan Mizoram a lo thleng.

Nimin vek khan Minister hian Aizawla Planning & Programme Implementation Conference Hall-ah thutkhawm a kaihruai a, India state hrang hranga district hnufum (Aspirational District) 112 thlanchhuahte tihhmasawwna tur a vil bik an ni chu ngaih pawimawh tur a nih thu sawiin, Niti Aayog hnuai a hmasawwna tehfung hrang hrang hrechiang tur leh awmze nei tak a hna kalpui turin kalkhawmte a chah a. Niti Aayog-a thawktute nen inpawh tak a inbetawn reng thin turin a chah bawk.

Kan corr report I lo ngaithla ang
VC

Union Minister of State hova thutkhawmah hian Mizoram dinhmun hriatchianna tur, Survey hrang hrang buatsaih tur a thawktute tan a Training mamawh a nih dan te tarlan a ni a. NITI Aayog hnuai a hmasawwna tehfung hrang hranga Mamit District dinhmun tarlanna leh hmachhawp awmte sawi ho niin, inkalpawhna changtlung zawk peihfel a nih hun ah chuan hmasawwna hna chak zawk a kalpui theih beisei a nih thu tarlan a ni bawk.

Pu Rao Inderjit Singh chuan Aspirational District-a Deputy Commissioner-te chu an District chhunga harsatnate hrechiang a, sukiang tura ruahmannate siam hmana an awm a pawimawh thu a sawi a. Mizoram state chhung ah Corporate Social Responsibility (CSR) tam zawk a luh theih nan tan a lakpui tur thu leh Multi-Dimensional Poverty Index buatsaih a pawimawh thu a sawi bawk a ni.

Union Minister of State hi nizan khan Raj Bhavan-ah a riak a, vawiin hian Hnahthial a tlawh ang a, Hnahthial DC Conference Hall-ah sorkar laipui ministry hrang hrang programme tih hlawhtlin a nih dan a ennawn pui dawn ni.

(CORR-Ruata)

<><><>

VBH Jt COMMITTEE

Mizorama kuhva chingtu pawl te chuan kuhva man sa lila-a hralh a ni chu District thuneitute phena kuhva tawlhlu-te samphiar zawm sorkar thuneitu sang zawkte ruahmannaah an ngai tih an sawi.

Vairengte Kuhva Chingtu Co-operative Society, Bilkhawthlir Kuhva Chingtu Co-operative Society leh Hachhek Bial Kuhva Chingtu Pawl Joint Committee chuan vawiin khan thuchhuah siamin he thu hi an tarlang a, dan loa ramdang kuhva man sa, Kolasib District Magistrate-in lila-a a hralh chu pawl an ti a. Kuhva tawlhru thinte thil tum leh duhtusam anga rorelna kalpui a ni ta mai chu Kuhva chingtute tan a lungchhiat tak zet a ni.

An thuchhuaha an tarlan danin, dan lo a Mizoram a Kuhva tawlhru thinten an kuhva man sa te chu ukil ruaiin lila a tiral turin thuneitute an lo sawipui tawh thin a, amaherawhchu hetiang a kuhva man sa lila-a tihral a nih chuan Mizoram kuhva hralhna a ti chhe leh zual dawn a ni, an ti a, kuhva sawngbawlsa leh dan loa ramdang atanga tawlhruk man tawh lila a hralh theih a nih chuan kum tluanin kuhva tawlhru te tan kawng hawn sakna a ni a, kuhva tawlhru thinten Mizoram sorkar kuta luhtir a, lila hmanga leichhuah leh mai chu an thiltum leh thiam taka an sawi fo thin a ni, an ti.

Mizoram sorkarin Kuhva chingtute aw aia kuhva tawlhru thinte aw a ngaipawimawh zawk ta mai chu mak an ti tih sawiin tun hnu-ah ramdang atanga danlo a kuhva tawlhruk man sa te lila hmanga hralh tawh lo turin thuneitute an ngen tih an sawi a, kuhva lila chu tutenge lei, a leitu tur an thlan dan leh lila chhangtute hming leh an leina rate-te puangzar turin Mizoram sorkar an phut tih an sawi a ni.

Hetihlai hian, Kuhva man sa te tih riral dan tur chungchanga Kolasib District Magistrate in an buaina a sawite chu chhuanlam tlingah an ngailo tih an sawi bawh a, a tihralnaa buaina an neih chuan an tihsak thei reng a ni tih thuneitute an hriattir tih an sawi a ni.

(PR)

<><><>

CM

Chief Minister Pu Lalduhoman Mizoram chu ram chhunga hmeichhiate dinhmun that berna zinga mi a nih hmel a, Mizo hmeichhiate chu state thawhchhuahah an inrawlhthuk hle, a ti.

Nimina Aizawl Vanapa Hall-ah Mizo Hmeichhe Insuihkhawm Pawl (MHIP) General Assembly Vawi 24 na a hmanpuinaah he thu hi sawiin Chief Minister chuan MHIP chuan mipuite zirtir leh rawngbawl hna a thawk nasa thin a ti a, Swardhar Greh leh One Stop Centre kan kalpui theihna kawngah te a thawh hlawk hle a. Beti Bachao Beti Padhao Scheme kalpuinaah sawrkar an thawhpui tha thin hle a, Fahrah

chawmna in “Hmangaihte Run” an nei a. Dan ang thlapa fa lak pawh kalpuiin, an zarah fahrah tam tak ten nu leh pa an neih phah a ni, a ti.

Chief Minister chuan Mizoram chu mipate rorelna hnam awmna a nih avangin Chhungkuaah hmeichhiaten an pasalte thu an ngaichang thin tur a ni a ti a. Thutawp siamna chi reng reng chu Pa kut a ni a, nupuite chuan an pasal te finchhuah se, an mawi lohna laite hliahkhuhin timawi zawk se. Chu chu nupui tha zia a ni, a ti.

MHIP khawmpuiaah hian nimin khan chawhnu lamah rorel inkhawm an nei a, vawiinah central YMA ten inthlanna an neihpui dawn a ni.

(DIPR)

<><><>

HOME MINISTER

Home Minister Pu K.Sapdangan nimin khan Central Jail a tlawh a. Central Jail-a cheng nuai 90 senga Ward sak thar (C Ward), tang 70 vel awm theihna tur chu a hawng nghal bawk.

Home Minister hian hmeichhe Jail (Central Women’s Jail), Central Jail bula mi pawh a tlawh a ni.

Central Jail hi kum 1986 Sept ni 15 a hawn a ni a, a building te a hluin, a chhe tawh hle a. Tunah hian SASCI Part I hnuai atangin cheng vaibelchhe 13 chuang senga sak that turin ruahmanna chak taka kalpui mek a ni. Home Minister leh dept. Official-te chuan Jail thiah huna tang te awm lailawkna lo ruahman dan tur te sawi hovin, an thlir ho nghal bawk a ni.

Tunah hian Central Jail-ah hian tang 854 an awm mek a. Lifer-56, Under Trial Prisoner(UTP)-457, RI Convict-263 leh SI Convict-78) te an ni.

Central Women’s Jail-ah hian tang 132 an awm mek thung a. Under Trial Prisoner(UTP)-96, RI Convict-23, SI Convict-6 leh Naupang-7 an ni.

(DIPR)

<><><>

BRAHMAPUTRA BOARD

Sorkar laipui Ministry of Jal Shakti hnuai a awm Brahmaputra Board Chairman Pu Ranbir Singh chuan Agriculture Minister, Irrigation & Water Resources enkawltu ni bawk Pu PC Vanlalruata chu a Pisa MINECO ah hmuin tui leh a kaihnawih chungchanga thil hrang hrang a Mizoram Sawrkar nen thawhdun dan an sawiho.

An inkawmnaah Minister Pu PC Vanlalruata chuan Mizoram lui hrang hranga tui chhekkhawlna dam te chi siam a rawt chu Pu Ranbir Singah chuan tha tiin hei hi an lo zirchian tur thu Minister a hrilh a. Pu Ranbir Singh a chuan Mizorama hman atan Flood Zoning Act siam te leh tui hna humhalh nan springshed management policy-te duan a pawimawh thu a sawi lang a. Kolodyne leh Khawthlang Tupui tana Master Plan chu Board in a buaipui mek thu Minister hrilhin hemi puitlin nan Mizoram Sawrkar thawhhona leh puihna an mamawh thu te a thlen bawk a ni.

Tarlan tawh angin Brahmaputra Board hotute hi Barak Basin Management Plan chungchanga inrawnkhawmna tel turin Aizawl an lo tlawh a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Vawiin chawhnu dar 2 leh a chanve-ah Chanchinthar puan leh a ni ang.



POSHAN PAKHWADA

Sorkar laipui hmalakna Poshan Pakhwada - 2025 puala hun hman mek kharna nimin khan Kolasib leh Khawzawl Dist ah te neih a ni a,
Kolasib-a hun hmanaah Anganwadi chu naupangten chaw tha leh ei tur dang an dawnna hmun chauh nilovin, an phak tawka ziak leh chhiar an zirna hmun leh nundan tha an zirna hmun anih thu te, nu leh pate pawhin an hlut thiam a, an chhawr tangkai thiam a tul thu te tarlan a ni a, khua leh Veng tina Anganwadi Centre te a lo changtlun zel theih nan VC te tanlakna a pawimawh thu tarlan a ni bawk a ni.
Kolasib a hun hmannaah hian kum 2024 - 2025 chhunga Kolasib District a Anganwadi Worker (AWW) leh Anganwadi Helper (AWH) hnathawk tha thlanna result puang in, lawmpuina thilpek leh Certificate hlan anni.
Poshan Pakhwada - 2025 hi Chawlhkar hnih chhung hman a ni a, nu leh naupangte tana chaw tha ei pawimawhzia inzirtirna a ni a, nimin khan Khawzawl ICDS Project bultumin Khawzawl Vengthar YMA Hall-ah a kharna inkhawm neih a ni a, he hunah hian Khawzawl ICDS Project hnuaia thawkte leh Khawzawl khawpui chhunga Village Council 10 atangin VC Member te an tel a ni.
VC Member te chu Coordination Committee a tel an nih angin Anganwadi enkawlnaah leh hmasawn chhoh zelnaah mawhphurhna an nei lian hle tih tarlan a ni.

(PTC's)



J&K

Jammu & Kashmir-a Pahalgam-ah firfiakten khualzin 26 an kaphlum a, midang engemawzatin hliam an tuar. Thudawn danin firfiakte chetna hi Srinagar headquarters atanga km 85 a hla, Anantnag district chhunga Pahalgam khuaah niin nimin chawhnu lam khan firfiakte hian khualzinte hi an bei a. Mitthi zingah hian rampawn mi pahnih leh Kashmiri pahnih an tel a ni.
Union Home Minister Amit Shah chuan nizan vek khan Srinagar thleng nghalin sawrkar official te nen high level meeting an nei nghal a. Union Home Minister hian vawiinah inbeihna hmun hi a tlawh dawn a ni.
President Droupdi Murmu-i chaun Pahalgam-a firfiakte chetna chu a dem thu sawiin vanduaina tawk chhungte a tawrhpuoi thu a sawi a. Prime Minister Narendra Modia pawhin firfiakte chetna chu a dem thu leh he pawikhawihnaa mawhphurtute chu chhuah an ni lo ang a ti. Saudi Arabia tlawha zin PM Modia hian a cham hun chhung pawt tawiin nizan khan a lo thlawk haw nghal a ni.
Khawvel ram hruiatute pawhin Pahalgam-a firfiakte chetna chu an dem thu an sawi a. US President Donald Trump-a chuan Prime Minister Modia leh India

mipuiteda tawrhpuithu lehpuih an ngaihna apianga pui tura a inpeih thu a sawi a. US chuan firfiakte dona kawngah India chu a thawhpui reng ang a ti bawk. Russia President Vladimir Putin-a pawhin Pahalgam-a firfiakte chetna chu a dem thu a sawi a. Pawikhawihute na taka hrem an nih ngei a duh thu a sawi a ni.

UAE pawhin Pahalgam-a firifiakte chetna chu an dem thu an sawi a. Anni bakah hian New Delhi-a Iran embassy pawhin firfiakte chetna chu an dem takzet tih thuchhuah siamin an tarlang a ni.

(Newsonair)

<><><>